

A ton pouvoir entens et voys  
 Le hault cry entendent les sours.  
 (Fol. xx.)

Et quant femme voudras auoir  
 A mariage bien regarde  
 En la mère si prens espoir  
 De ces fort belles si te gardes  
 Chascun y veult tirer sa darde  
 Jeune la prends a ton plaisir  
 A Dieu puis en laisse la garde  
 Et daultre plus n'ayes desir.

Dune femme tout le tresor  
 Gist en son honneur et honte  
 Son vaillant neu mye en or  
 Ne en sa haulte parente  
 Mais en la noble volente  
 Que iamais ne quiert auoir blasme  
 Cest a celuy grant bien heurte  
 Qui trouuer peut loyalle femme.  
 (Fol. xxj.)

De poures gens ayes pitie  
 Que verras en grant indigence  
 Cest a Dieu monstre amytié  
 Donne leur selon ta puissance  
 Et la diuine prouidence  
 Le te rendras n'en doubtes pas  
 C'est la souueraine semence  
 Qui nourrist apres le trespas.

Une fois le iour que tu pries  
 Pour les ames des tres passes  
 Bien ten viendra te certifie  
 Nous y sommes tenuz assez  
 Deuons deuant oultre passez  
 Deuons auoir tousiours memoire